



Come che o savêš, joibe stade, ai 16 di Jugn, si è davuelte in chel di Rivis, la serade inmaneade dal nestri blog in colaborazion cun la [Associazione 1511](#). La serade e je lade une vore ben, ma o vin pensât di dâ la peraule, par contâusale, a Elena Zanussi, Assesore ae culture dal Comun di Sedean e a cualchi foto fate in chê sere.

E par cui che al à gust di viodi di lei in formât pdf dut ce che al è stât let, ae fin dal articul us lassìn ancje il librut digjitâl di scjamâ.

Storie e fantasie sul pêl de aghe de Roie di Sant Durî

I 500 agns dal riviel contadin te suaze dal mulin di Rivis

Mulin di Rivis di Sedean dongje dal Tiliment e ad ôr de Roie di Sant Durî ai 16 di Jugn: in chest lûc li che si à cirût in chescj ultins agns di fermâ il timp, recuperant l'edifici e la strutture par metile a disposizion di scuclis, di ativitât di ricercjis, di iniziativis culturâls e turistichis, si à davuelte une serade dedicate ai 500 agns dal riviel contadin in Friûl, inmaneade de Aministrazion Comunâl di Sedean-Assessorât ae Culture, Sportel Intercomunâl pe lenghe furlane, Associazione 1511, Contecurte e in colaborazion cu la Pro Loco di Rivis.

Il mulin scomençât a fâ su tal 1774 al è stât atîf fin tal 2006 graziis al mulinâr Lionillo di Benedetto e ae sô famee che tal ultin secul e à lavorât chenti. Cumò il mulinâr al è daûr a pandi i segrets dal mistîr ae comunitât di Rivis, dome a di chei però che lui si fide par vie de gjelositât e de ruspiositât cognossude dai mulinârs, in maniere che il mulin, comprât e metût a puest de Aministrazion Comunâl di Sedean, al sedi gjestît e metût in moto de comunitât stesse che chest lûc i parten ad implen.

I mulins dilunc dai secui a son simpri stâts cûr de vite sociâl e salacor a son stâts ancje teatris dai riviei contadins. Duncje la suaze e jere chê juste par inmaneâ un incuintri di caratar storic-leterari.

La formule proponude de Associazion 1511 e dal blog Contecurte e je stade pardabon preseade: cronachis dal timp e narazions di fantasie, scritis di pueste par memoreâ chescj 500 agns, letis e contadis di Raffaele Serafini e di Checo Tam si son miscliçadis insiemi par ufrî ae tante int presinte une cerce dai acjadiments e des atmosferis di chei timps. A Carli Pup il rûl di intervignî sui aspiets storics de vicende. Lis peraulis dai trê son stadis compagnadis, in sot font, de musiche de aghe de roie mote di une coclee (cognossude za te ete antighe cul non di “ruede di Archimede”), un sisteme che al dopre la aghe par produci energjie eletriche in maniere nete e sostignibile.

Il timp al à corût vie di corse e cul public dut atent e in scolte par scuvierzi ancje cemût che e lave a finî la conte scrite di pueste pe ocasion di Raffaele Serafini e ambientade propit li ta chel mulin. Une biele sorprese e un biel regâl di bande di Contecurte che i organizadôrs dal incuintri a àn preseât une vore.

Cualchi domande insom de serade e à mostrât che l’interès par lâ plui insot de cuestion al è. Tancj di chei che a son corûts li ta chel lûc, plens di curiositâts e cu la gole di passâ une serade difarente, po dopo si son fermâts par dâ un cuc al puest stant che il prof. Gotart Mitri, studiôs di Rivis e presint in cheste ocasion, in cuatri e cuatri vot al à dât la disponibilitât par dâ spiegazions sul funzionament dal mulin e dal so disvilup dilunc dai secui.

No si podeve no finî cuntun tai e un toc di formadi parcè che di Rivis, la Pro Loco, no ti lasse mai lâ vie cence vêti dât il bon acet furlan fin insom.

In sumis une maniere gnove e salacor di sfrutâ chest mût di contâ la nestre maraveose e impuartante storie furlane. L’auguri al è di vê voie di cognossile miôr e di jessintint braurôs stant che e je siore di events unics che a dan “sostance” ancje al nestri jessi furlans.

di Elena Zanussi







Note: te pagine dai spettacui o podês cjatâ il librut digjitâl dal event